



**Ikaduhang Dominggo sa Pagkabanhaw**  
**Dominggo sa Diyosnong Kalooy**  
**Abril 27, 2014**

## **Ma-Dominggong Tamdanang Liturhikal alang sa Simbahan sa Kabus sa Diwa sa Bag-ong Ebanghelisasyon**

**A**ng Simbahan sa Kabus, pinaagi sa Gagmayng Simbahanong Katilingban, makasagubang sa mga pagsulayng matagamtam sa bag-ong kinabuhi nga gipuy-an nga hiniusa sa mga kabus isip luna sa pagtagbo sa Nabanhawng Jesus, pinaagi sa pagsalig diha sa Diyosnong Kalooy.

Niining Ikaduhang Dominggo sa Pagkabanhaw, Dominggo sa Diyosnong Kalooy, gidapit kita sa Simbahan sa pagsalig sa diyosnong pagkamanggihatagon sa kasingkasing ni Jesus sa atong pagsagubang sa mga pagsulay sa atong Kristohanong kinabuhi karon. Ipadayon nato ang atong pagbasa ug pagpamalandong sa pagsabot sa PKP-II bahin sa ekonomikanhon ug politikanhong konteksto uban sa pagsalig nga kining Diyosnong Kalooy ni Jesus motabang kanato.

Matud pa sa PKP-II: **(26)** “Sa maayong palad, dili tanan kangingit. Ang pagkawalay gana sa karaang han-ay nagkadako ug aduna nay mga positibong lakang nga gitugbang niini. Malipay kita sa pagdaghan sa mga NGOs (mga organisasyong dili sa gobierno) ug mga POs (mga organisasyon sa katawhan) nga hinayhinayng mingtunga kaniadtong mga tuig ‘50 ug ‘60, ug mas nidaghan pa niining miaging dekada, aron mohimo ug mga organisadong lakang, diha sa mga yanong katawhan, arong sagubangon ang atong daghan ug bug-at ug nagkutay-kutayng mga sulirang katilingbanon. Ang ilang mga paninguha mitugbang sa halapad nga han-ay sa mga interés: ang ekolohiya, panglawas ug mga proyekto alang sa panginabuhi sa kabus, nasudnong sobereniya ug bag-ong matang sa politika, ang kaangayan sa babaye ug lalaki, pagpanalipud sa mga katungod sa

### **RITO SA PAGSUGOD**

**P:** Sa ngalan sa Amahan ug sa Anak ug sa Espiritu Santo.

**K:** *Amen.*

**P:** Ang Kalinaw sa Nabanhawng Ginoo maanaa kaninyo.

**K:** *Maanaa usab kanimo.*

mga kabataan ug sa mga may-apan, kalinaw ug pagresolba sa mga bangi, pagkontrola sa pagdagsang sa mga hinagibang mobuto, tawhanong katungod – hataas ang lista.

**(27)** Kadaghanan sa mga panghitabo nga atong gihisgotan dinhi minglambo sa hilom ug ginagmayng resulta, ug nga kini nanghitabo gayod hinungdan na sa halawom nga paglaom. Kay giigo niini ang mga gamut sa walay kaangayan sa Pilipinhong katilingban. Sa iyang tinguhang konsentrado sa pagpagahom sa mga walay gahom aron molihok gayud sila alang sa kaayohan sa tanan (may tabang man gikan sa gobierno ug gikan sa mga inilang gamhananang daan o wala) konkretong gipraktika niini ang duha ka yaweng hunahuna nga gipatigbabaw sa mga bag-ong pagtulun-an sa Santo Papa bahin sa mga butang katilingbanon: ang pagpakigduyog o solidaridad ug ang gugma sa pagpalabi sa mga kabus.”

Katingad-an kaayo kining kontekstong gikulit sa PKP-II: ang iyang makabungog nga kahilom bahin sa mga sulirang giatubang sa kinabag-ang kabus sa atong katawhan: yuta alang sa mga mag-uuma, ug pamuo ug husto ug pampamilyang sweldo alang sa mga mamumuo. Ang paghikalimot sa atong kinabag-ang kabus nga nagpas-an sa mga bug-at nga mga palas-onon usa na ka pagsulay mismo. Mao man gani nga sa pagbasa pa lang sa kahimtang tawhanon, atong nang ibutang daan ang pagsalig sa diyosnong kalooy sa kasingkasing ni Jesus nga pagatabangan kita sa pagtugkad ug pagsabot sa kinahiladman sa kinabuhi sa atong mga kabus! Niana lamang paagiha mailhan nato sila ug unya epektibong makaduyog kita kanila ug palabihon nato sila sa paghigugma sa kinasingsing gayud! ■

## **Pasiuna ug Pag-abi-abi**

Mga minahal kong mga igsoon:  
ipadayon nato ang pagtagamtam sa kalipay sa Pagkabanhaw! Ato kining ipadayon uban sa pagsalig sa Diyosnong Kalooy nga nagatubod gikan sa mahal nga kasingkasing ni Jesus nga nahigugma kanato pinaagi sa iyang tawhanong kasingkasing. Kay gikan sa mahal nga kasingkasing ni Jesus nga nakadawat kita sa kalooy ug grasya, paglaom ug kaluwasan, hustisya ug kalinaw sa atong pagsagubang sa inadlaw-adlawng mga pagsulay sa atong Kristohanong kinabuhi nga nagtinguha sa pagpuyo sa kinabuhing komun uban sa mga kabos.

## **Akto sa Paghinulsol**

P: Mga igsoon, aron maandam kita sa pagsaulog nga angayan niining mga balaang mga misterio, atong dawaton ang atong mga kasal-anan, ug pangayoon ta sa Diyos ang iyang pasaylo ug kalig-on.

P: Nagakompisal ako..

*K: Sa Dios makagagahum sa tanan, ug kaninyo, mga igsoon..*

P: Kaloy-an unta kita sa Dios...ngadto sa kinabuhing dayon.

*K: Amen.*

P: Ginoo, kaloy-i kami.

*K: Ginoo, kaloy-i kami.*

P: Kristo, kaloy-i kami.

*K: Kristo, kaloy-i kami.*

P: Ginoo, kaloy-i kami.

*K: Ginoo, kaloy-i kami.*

## **Himaya sa Diyos didto sa langit...**

### **Kolekta**

P: Mag-ampo kita: Diyos sa walay kinutubang kalooy, sa pagsaulog pag-usab sa Pasko sa Pagkabanhaw imong gidagkotan ang pagtoo sa katawhan nga imong giangkong imoha, padaghana, naga-ampo kami, ang grasya nga imong gituga aron mahuptan ug hustong masabtan sa tanan kung diing tinubdan sila gihugasan, kang kinsang Espiritu sila natawo pag-usab, kang kinsang Dugo sila giluwat. Pinaagi sa among Ginoong

Jesukristo Imong Anak, nga buhi ug hari uban Kanimo diha sa kahiusahan sa Espiritu Santo, Dios nga usa, hangtud sa kahangturan.

*K: Amen.*

## **LITURHIYA SA PULONG**

### **Unang Pagbasa: Buhat 2:42-47**

L: Ang pagbasa gikan sa Mga Buhat sa mga Apostoles.

Nagmatinud-anon sila sa gipanudlo sa mga apostoles bahin sa katilingbanong pagkinabuhi ug pag-inambitay, sa kasaulogan sa pagpikaspikas sa pan ug sa mga pag-ampo. Midangat sa tibuok katawhan ang balaang kahadlok tungod sa daghang katingalahan ug milagrosong tilimad-on nga gihimo sa mga apostoles.

Karon ang tanang matoohon naghiusa pagpuyo ug nag-inambitay sa ilang mga kabtangan. Gibaligya nila ang tanang kabtangan ug ang tanan nga giisip nga ilaha. Ang abot niini giapud-apod ngadto sa uban sumala sa panginahanglan sa matag-usa. Matag adlaw nagtigom sila sulod sa Templo. Nagpikaspikas sila sa pan sa ilang mga balay ug nag-ambitay sa pagkaon sa dakong kalipay ug kayano sa kasingkasing. Naghimaya sila sa Diyos ug gikahimut-an sila sa katawhan.

Matag adlaw gidugangan sa Ginoo ang gidaghanon sa mga naluwas.

L: Ang Pulong sa Ginoo.

*K: Salamat sa Dios.*

### **Komentaryo sa Buhat 2:42-47:**

Kini ang dramatikong paglarawan ni Lukas sa epekto sa pagkunsad sa Espiritu Santo ug sa pagsangyaw sa mga apóstoles diha sa bag-ong Kristohanong katilingban. Sa ilang pag-abli sa ilang mga kasingkasing alang sa mata'g-usa, ang mga sakop sa simbahan hinayhinay nga nagkasinabtanay bisan tuod lainlain ang ilang mga isigka-pinulungan. Nagkatigom sila diha sa pagsangyaw

sa Pulong ug sa pagpikas-pikas sa pan. Naghinulsol sila ug nagpabunyag. Ang ilang bunyag nagtultol kanila ngadto sa bag-ong matang sa pagpuyo diha ni Jesus, ang Nabanhawng Ginoo: ang ilang paghangop sa mga gitudlo sa mga apóstoles, ang ilang panagdait, ang pagpikaspikas sa pan ug mga pag-ampo. Sa konkreto, ang bag-o, buhi ug naluwas nga katilingban ni Kristo nagpasabot niini: hiniusang pagpuyo nga komun – usa ka kalibutan, usa ka kinabuhi – pinaagi sa pagbaligya sa ilang mga kabtangan ug pag-apud-apod sa halin subay sa panginahanglan sa mata'g usa. Kining buhat sa gugma ug hustisya hiniusang gisaulog sa mga pag-ampo ug sa Eukaristiya. Ang pagdaghan sa ilang mga sakop tungod man kini sa presensya sa Espiritu Santo, sa pagkamatitud-anon sa mata'g usa kang Jesus ug sa buhing-pagsaksi sa bag-ong natawong simbahan.

**Salmo Responsoryo: Sal 118:2-4, 13-15, 22-24**

**T: Pasalamat ang Ginoo, kay siya maayo: “Molungtud ang iyang gugma sa kahangtoran.” o T: Aleluya.**

L: Pasultiha ang Israel: “Moluntad ang iyang gugma sa kahangtoran.” Pasultiha ang banay ni Aaron: “Moluntad ang iyang gugma sa kahangtoran.” Pasultiha ang nataha sa Ginoo: “Moluntad ang iyang gugma sa kahangtoran.”

**T: Pasalamat ang Ginoo, kay siya maayo: “Molungtud ang iyang gugma sa kahangtoran.” o T: Aleluya.**

L: Giduot ko nila ug hapit na ko malukapa; apan ang Ginoo mitabang nako. Ang Ginoo maoy kusog ko ug honi; panabang ug kaluwasan ko siya. Ang malipayong singgit sa kadaogan, sa mga tolda sa tarong kini madunggan:

**T: Pasalamat ang Ginoo, kay siya maayo: “Molungtud ang iyang gugma sa kahangtoran.” o T: Aleluya.**

L: Ang bato nga gisalikway sa magtutukod nahimong bato nga sukaranan. Mao ni ang mga buhat sa Ginoo, nga gikatingad-an nato. Ang

adlaw ni nga sa Ginoo gihimo; maglipay ug magsadya ta diha niya.

**T: Pasalamat ang Ginoo, kay siya maayo: “Molungtud ang iyang gugma sa kahangtoran.” o T: Aleluya.**

**Komentaryo sa Sal 118:**

Bisan tuod kini awit sa pasalamat sa usa ka binuhat, kining salmoha sa tinuoray adunay duha ka awit. Ang una giawit sa usa ka binuhat: bb. 1-21; ang ikaduha giawit sa usa ka katilingban, bb. 23-27. Ang bersikulo 22 mao ang transisyon. Ang bb. 28-29 mibalik sa usa ka binuhat nga mikanta sa pasiunang bersikulo. Sa laing bahin, mahimo usab nga ang salmo bahinon sa duha, sa laing hinungdan: ang unang bahin nahitabo sa mga tolda sa katawhan sa Jerusalem (bb. 5-18); ug ang ikaduha nahitabo diha sa sulod sa templo (bb. 19-29). Ang hinungdan sa pasalamat mao ang kasinatian sa usa ka binuhat sa kalooy sa Diyos nga nakapalingkawas kaniya. Apan kining kasinatiang indibiduwal kasinatiang katilingbanon man usab. Siya nga gipaantus, ang bato nga gisalikway sa mga magtutukod, gihimo sa Ginoo nga bato nga sukaranan: usa ka lig-ong pundasyon sa pagtoo, diha sa templo.

**Ikaduhang Pagbasa: 1 Ped 1:3-9**

L: Ang pagbasa gikan sa Unang Sulat ni San Pedro.

Dayegon ta ang Diyos, ang amahan sa atong Ginoong Jesu Cristo, tungod sa iyang kaluoy. Sa pagkabanhaw ni Cristo Jesus sa minatay, gitagaan ta niyag bag-ong kinabuhi ug paglaom sa pag-ambit sa kinabuhing malungtaron human sa kamatayon, sa sala ug sa tanang lumalabay. Kining kabilina giampingan sa kalangitan alang ninyo. Kay ang gahom sa Diyos maghimo ninyong matitud-anon hangtod nga mabutyag ang kaluwasan sa kataposang mga adlaw.

Adunay hinungdan sa kalipay, bisag sa usa ka panahon, sulayan mo pag-ayo.

Hinunoa, ang inyong pagtoo sulayan daw bulawan sa hudno. Apan ang bulawan molabay lang. Ang pagtoo nga mas bililhon kaayo, sa kataposan magdalag pagdayeg, himaya, ug dungog inigpakita na ni Cristo Jesus. Wala pa siya makita, apan nahigugma na mo niya. Mitoo na mo bisag wala pa siya makita. Busa, nakatagamtam mog langitnong kalipay nga dili matukib sa mga pulong, kay nakab-ot ang katuyoan sa pagtoo: ang kaluwasan sa kalag.

L: Ang Pulong sa Ginoo.

K: *Salamat sa Dios.*

### **Komentaryo sa 1 Ped 1:3-9:**

Kini mao ang kang Pedro, o sa iya ba hinoong tinun-an, nga pagpanalangin sa Dios: ang pagpasalamat sa Diyos panalangin man kaniya. Tingali hinukad kini gikan sa usa ka awit pangbunyang nga nagmaya sa mangilngig nga kalooy sa Diyos nga naghatag kanato'g bag-ong kinabuhi. Ang bag-ong kinabuhi ginapuy-an diha sa paglaom nga gialimahan sa Pagkabanhaw. Gipanalipdan kini sa pagtoo samtang nagapaabot sa kahingpitan sa kaluwasan sa umaabot. Nagpuyo diha sa kalipay, kining bag-ong kinabuhi gisulayan nang daan karon pinaagi sa mga panggukod ug kasakitan tungod sa panggukod. Apan kining maong kasinatian sa tinuod pa pagsulay man sa pagtoo: ang pagsulay nagapalig-on sa pagtoo, mohimo kaniyang matinud-anon alang sa himaya ni Jesus. Ang silaw sa pagtoo mao kini: bisan tuod wala kita makakita kang Kristo, apan nahigugma kita kaniya; bisan tuod wala nato siya hik-it, apan nagatoo kita kaniya, uban sa kalipay hangtud nga ang kaluwasan, ang tuyo sa pagtoo, makab-ot.

### **Berso sa Aleluya:**

T: **Aleluya, aleluya.** *Mitoo ikaw kanako, Tomas, kay nakakita ka man kanako, nag-ingon ang Ginoo; bulahan kadtong wala makakita kanako apan mitoo gihapon! T:*

### **Aleluya, aleluya.**

### **Ebanghelyo: Juan 20:19-31**

P: Ang Ginoo maanaa kaninyo.

K: *Maanaa usab kanimo.*

P: Ang Santos nga Ebanghelyo Sumala ni San Juan.

K: *Himayaon ikaw, O Ginoo.*

Sa gabii adtong adlaw, ang unang adlaw human sa adlaw sa pahulay, gitrangkahan ang mga pultahan sa balay diin nagtigom ang mga tinun-an, kay nahadlok sila sa mga Judio. Unya, mitungha si Jesus ug mipataliwala nila. Miingon siya: “Ang kalinaw manaa ninyo!” Dayon, mipakita siya sa kamot ug kilid. Ang mga tinun-an mitutok sa Ginoo nga puno sa kalipay. Misulti na pod si Jesus: “Ang kalinaw manaa ninyo. Ingon nga gipadala ko sa Amahan, nagpadala sab ko ninyo.” Human ini, mihuyop siya ug miingon: “Dawata ang Espiritu Santo. Ang mga sala nga inyong pasayloon, mapasaylo sab; ang igaid, maginaid sab.”

Si Tomas, nga gitawag og Kaluha, usa sa 12, wala diha sa pagpakita ni Jesus. Busa, gisultihan siya sa ubang tinun-an: “Nakita namo ang Ginoo!” Miingon siya: “Gawas kon makita ko ang giagian sa lansang sa iyang kamot ug masulod ini ang akong tudlo, ug ang akong kamot sa iyang kilid, dili ko motoo!”

Human sa walo ka adlaw, nagtigom na sab ang mga tinun-an sulod sa lawak. Diha na si Tomas. Bisag gitrangkahan ang pultahan, nakasulod gihapon ang Ginoo. Mibarog siya sa taliwala nila ug miingon: “Ang kalinaw manaa ninyo.” Unya, miingon siya kang Tomas: “Isulod ang imong tudlo dinhi ug tan-awa ang akong kamot. Ituy-od ang imong kamot ug ituslok sa akong kilid. Ayaw nag duhaduha. Hinunoa, too!” Si Tomas miingon: “Akong Ginoo ug akong Diyos!” Si Jesus mitubag: “Mitoo ka, kay nakita ko nimo, dili ba? Bulahan ang mitoo bisag wala makakita.”

Daghan pang milagro ang gibuhat ni Jesus atubangan sa mga tinun-an, nga wala masulat dinhi. Gisulat ni aron motoo mo nga si Jesus mao ang Cristo, ang anak sa Diyos. Too ug sa Ngalan niya makabaton mog kinabuhi.

P: Ang Ebanghelyo sa Ginoo.

K: *Daygon Ikaw, O Kristo.*

**Komentaryo sa Juan 20:19-31:**

Usa kini ka yaweng asoy gikan sa daghang mga sugilanon bahin sa Pagpakita sa Nabanghawng Jesus sa Ebanghelyo ni Juan. Katingalahan ang pagpakita ni Jesus, ug gipaila niya ang iyang kaugalingon ngadto sa mga disipulo isip mao gihapong tawhana nga gisakit ug namatay, minarkahan sa mga uwat ug samad sa iyang pagpasakit ug kamatayon. Tataw kaayo ang kahinangop sa mga disipulo nga midawat kaniya: dili diay siya patay! Ug gipadayon ni Jesus pagpa-ila ang iyang pagka-diyosnon: miginhawa siya ngadto kanila, ug nagbunyag kanila uban sa Espiritu Santo. Bag-o na silang binuhat: ang espiritu/ginghawa sa Diyos naghatag kanila’g kinabuhi subay sa Karaang Panahon, apan ang espiritu nga ilang nadawat karon mao ang espiritu niya nga nabanhaw gikan sa mga minatay! Ug sa paghimo kanilang bag-o, gipaambit ni Jesus kanila ang iyang misyon nga iya ra usab nadawat gikan sa Amahan. Ang saad sa Katapusang Panihapon nagnuod na. Ang gikinahanglang kamatuoran ni Tomas nga buhi gayod si Jesus gikan sa mga minatay nahingpit na. Apan si Juan nag-ingon kanato: sa umaabot ugma, ang panagbagat kang Jesus ug ang pag-ambit sa iyang suod nga presensya mahitabo tungod sa pagsaksi sa mga mingtoo kaniya ug sa ebanghelyong nahisulat, ang Nindot nga Balita, ang Pulong sa Diyos sa atong panahon!

**Ang Simbahan sa Kabus, pinaagi sa Gagmayng Simbahanong Katilingban, makasagubang sa mga pagsulayng matagamtam sa bag-ong kinabuhi nga gipuy-an nga hiniusa sa mga kabus isip luna sa pagtagbo sa Nabanhawng Jesus, pinaagi sa pagsalig diha sa Diyosnong Kalooy.**

Sumadang Mensahe sa mga Pagbasa sa Dominggo	Ang Simbahan sa Kabus: Konkretong Hulagway sa kabus ug sa ilang kahimtang	Mga Puntos para sa Pamalandong/Panawagan/Hagit
<p>Ang Simbahan sa Kabus, pinaagi sa Gagmayng Simbahanong Katilingban, makasagubang sa mga pagsulayng matagamtam sa bag-ong kinabuhi nga gipuy-an nga hiniusa sa mga kabus isip luna sa pagtagbo sa Nabanhawng Jesus, pinaagi sa pagsalig diha sa Diyosnong Kalooy.</p>	<p>Adunay bay kalihukan diha sa inyong GSK nga gipasi-ugdahan sa mga dato ug maayong pagkabutang aron ipaambit ang ilang mga kabtangan sa mga kabus nga uban kaniyo? Sa unsang paagiha? Kon wala, makaplano ba kaha kamo alang niini? Ang bunga niining pagpaambit mao ang gugmang naglihok pinaagi sa hustisya ug kaangayan nga mobunga usab sa malingkawanong kalipay ug halawom nga panagdait.</p>	<p>Ang Nabanhawng Jesus naghatag kanato’g ginhawa alang sa bag-ong kinabuhi ug misyon: ipadayag ug saksihan ang bag-ong kinabuhi nga giusa uban sa mga kabus, madasigon nga masagubang nato pag-ayo ang mga pagsulay pinaagi sa pagsalig sa diyosnong kaayo sa iyang kasingkasing.</p>

## **Padayag sa Pagtoo**

P: Nagatoo ako...

K: ...Sa Dios ang Amahan ang makagagahum sa tanan, Magbubuhay sa langit ug yuta; nagatoo ako kang Jesukristo, ang Iyang bugtong Anak, atong Ginoo. Gipanamkon Siya sa lalang sa Espiritu Santo, (*Moyukbo ang tanan*) ug natawo gikan ni Maria nga Ulay. Nag-antos Siya sa sugo ni Poncio Pilato, gilansang sa krus, namatay ug gilubong. Miadto Siya sa mga nangamatay. Sa ikatulong adlaw nabanhaw Siya. Misaka Siya sa langit ug nagalingkod sa too sa Dios, ang Amahan, ang makagagahum sa tanan. Mobalik Siya aron paghukom sa mga buhi ug sa mga minatay. Nagatoo usab ako sa Espiritu Santo, sa santos ug Katoliko nga Simbahan, sa pagpasalyo sa mga sala, sa pagkabanhaw sa lawas, ug sa kinabuhing walay katapusan. Amen.

## **Mga Katilingbanong Pag-ampo**

P: Mga hinigugma kong mga igsoon, mapaubsanon ug masaligon natong itaas ang atong mga tingog sa pag-ampo ngadto sa atong langitnong Amahan. Sa mata'g pag-ampo, kita motubag: Ginoo, ipaulan kanamo ang imong diyosnong kalooy.

***T: Ginoo, ipaulan kanamo ang imong diyosnong kalooy.***

L: Mag-ampo kita alang sa Simbahan: nga isip Simbahan sa Kabus sa tibook kalibutan, iya untang ipadayon ang pagsangyaw ug pagsaksi sa bag-ong kinabuhi nga gipuy-ang hiniusa ug komun uban sa mga kabus isip ang pinakanindot nga bunga ug pamaagi sa Ebanghelisasyon. Mag-ampo kita sa Ginoo.

***T: Ginoo, ipaulan kanamo ang imong diyosnong kalooy.***

L: Alang sa atong Santo Papa Francisco I, sa mga obispo, pari, diyakono, kanilang nanagpuyo sa kinabuhing

konsagrado ug sa tanang gitugyanan sa pag-amoma ug pagdumala sa Simbahan isip Katawhan sa Dios: nga ila untang ipadayon ang pagsaksi sa Pulong nga nahisulat pinaagi sa pagdasig sa mga adunahan nga magpuyong gihiusa sa mga kabus ug mahigugma kanila sa pinaaging pinalabi. Mag-ampo kita sa Ginoo.

***T: Ginoo, ipaulan kanamo ang imong diyosnong kalooy.***

L: Alang sa mga lideres sa kalibutan ug sa tanang gitugyanan sa pangagamhanan ug pagdumala sa mga butang sa kalibutan: nga mag-una unta sila sa pagpakaylap sa paghatag ug yuta ngadto sa mga walay yuta ug mga mag-uuma, pamuo ug husto ug makapabuhay sa pamilyang sweldo, ang pagpanalipud sa tawhanong mga katungod alang sa tanan, ilabi na gayud sa katumanan sa mga gipangitang hustisya ug indemnipikasyon niadtong mga nalapasan sa katungod pinaagi sa estado ug sa pwersang pangseguridad niini. Mag-ampo kita sa Ginoo.

***T: Ginoo, ipaulan kanamo ang imong diyosnong kalooy.***

L: Alang kanatong tanan, mga lumulupyong sa kalibutan ug sakop sa kalangitan: nga ato untang puy-an ang atong kinabuhi sumala sa mga bili sa bag-ong kinabuhi nga gipuya-ang hiniusa ug komun uban sa mga kabus: mahigugmaon, makatarunganon, maaghop ug mapasayloon, manggihatagon ug maatimanon sa mga panginahanglan sa uban, madaiton ug andam sa pagpaambit nga walay kinutuban, kay ang kalibutan ug ang mga butang niini angay gayud paga-ambitan natong tanan. Mag-ampo kita sa Ginoo.

***T: Ginoo, ipaulan kanamo ang imong diyosnong kalooy.***

L: Alang sa atong mga minahal sa kinabuhi nga milalin na: nga diha sa kapasayloan sa ilang mga sala,

maila na unta ang pahulay nga dayon diha sa kasingkasing sa atong Ginoo ug Manluluwas, si Jesukristo. Mag-ampo kita sa Ginoo.

**T: *Ginoo, ipaulan kanamo ang imong diyosnong kalooy.***

L: Alang sa atong mga espesyal nga mga tinguha, sa kahilom sa atong tagsa-tagsa ka kasing-kasing, (*mohilum kadiyot*) .... Mag-ampo kita sa Ginoo.

**T: *Ginoo, ipaulan kanamo ang imong diyosnong kalooy.***

P: Ginoo, mao kini ang among mga pag-ampo alang kanimo niining Dominggo sa Diyosnong Kalooy. Nagahangyo kami kanimo: ihatag kini kanamo pinaagi sa pagkamanggihatagon sa maloloy-ong kasingkasing sa imong Anak. Kini among gipangayo pinaagi ni Kristo atong Ginoo.  
*T: Amen.*

## LITURHIYA SA EUKARISTIYA

### **Paghalad sa mga Gasa**

P: Dayegon ikaw, Ginoong Dios sa tanang kalibutan, kay gikan sa imong kamanggihatagon nadawat namo kining among gihalad kanimo, ang pan nga abut sa yuta ug ginama sa kamot sa mga tawo. Mahimo kini nga kalan-on sa kinabuhi alang kanamo.

*K: Daygon ang Dios hangtod sa kahangturan.*

P: Dayegon ikaw, Ginoong Dios sa tanang kalibutan, kay gikan sa imong kamanggihatagon nadawat namo kining among gihalad kanimo, ang bino nga abut sa yuta ug ginama sa kamot sa mga tawo. Mahimo kini nga ilimnon nga espirituhanon alang kanamo.'

*K: Daygon ang Dios hangtod sa kahangturan.*

P: Mga igsoon, pag-ampo kamo, aron ang ako ug ang inyong sakripisyo dawaton unta sa Dios nga Amahan, makagagahom sa tanan.

*K: Dawaton unta sa Ginoo ang sakripisyo gikan sa imong mga kamot; alang sa*

*pagdayeg ug paghimaya sa iyang ngalan, alang usab sa atong kapuslanan ug sa tibuok niyang santos nga Simbahan.*

### **Pag-ampo Alang sa Mga Halad**

P: Dawata, O Ginoo, naga-ampo kami, kining mga halad sa imong katawhan (ug nilang imong gidala ngadto sa bag-ong kinabuhi), nga nabag-o tungod sa paglitok sa imong ngalan ug pinaagi sa Bunyag, makab-ot unta nila ang walay katapusang kalipay. Pinaagi ni Kristo among Ginoo.

*K: Amen.*

### **Prepasyo**

P: Ang Ginoo maanaa kaninyo.

*K: Maanaa usab kanimo.*

P: Ibayaw ang inyong mga kasingkasing.

*K: Amo nang gibayaw ngadto sa Ginoo.*

P: Magpasalamat kita sa Ginoong atong Dios.

*K: Angay ug matarong.*

P: Angay ug matarung gayud, sibo ug makaluwas, kanunay ug sa tanang dapit apan ilabi na gayud niining panahona, O Ginoo, nga dayegon ikaw sa tumang paghimaya, kay si Kristo nga among Pasko nahalad na man.

Kay siya ang tinuod nga kordero nga nagawagtang sa mga sala sa kalibutan: sa iyang kamatayon iyang gigun-ob ang kamatayon; ug sa iyang pagkabanhaw, iyang giuli ang kinabuhi.

Busa, puno sa kalipay sa pasko sa pagkabanhaw, ang mata'g yuta, ang mata'g katawhan nagadayeg sa imong himaya ug bisan gani ang mga gahum sa kalangitan, uban sa mga panon sa mga anghel, nagadungan sa pag-awit sa walay katapusang imno sa imong himaya, sa ilang pag-ingon:

### **Santos**

*K: Santos, Santos, Santos nga Ginoo,*

*Dios sa kagahaman. Puno ang langit ug yuta sa imong himaya. Osana sa kahitas-an. Dayegon ang nagaanhi sa ngalan sa Ginoo. Osana sa kahitas-an.*

### **Pag-ampo sa Eukaristiya**

*(Human sa konsagrasyon, ang aklamasyon:)*

P: Kini ang misteryo sa pagtoo.

K: *Luwasa kami, O Manluluwas sa kalibutan, kay pinaagi sa imong Krus ug Pagkabanhaw, gihatagan mo kami'g kagawasan.*

*(Sa pagtapos sa Pag-ampong Eukaristiko, ang pari moingon:)*

P: Pinaagi kaniya, uban kaniya ug diha kaniya, gihatag nganha kanimo makagagahom nga Amahan, diha sa kahiusa sa Espiritu Santo ang tanang dungog ug himaya hangtod sa kahangturan.

K: *Amen.*

### **Rito sa Pangalawat**

P: Karon mag-ampo kita sa Amahan, atong gamiton ang mga pulong nga gitudlo kanato sa atong Manunubos.

K: *Amahan namo, nga anaa sa mga langit, pagdayegon ang imong ngalan, umabot kanamo ang imong ginharian, matuman ang imong pagbuot dinhi sa yuta maingon sa langit. Ang kalanon namo sa matag adlaw, ihatag kanamo karong adlaw ug pasayloa kami sa among mga sala, ingon nga nagapasaylo kami sa mga nakasala kanamo, ug ayaw itugot nga mahulog kami sa panulay hinonaa luwasa kami sa dautan.*

P: Mangayo kami kanimo, Ginoo, nga imo kaming luwason sa tanang dautan. Hatagi kami sa kalinaw niining panahona, aron, tinabangan sa imong kalooy, mahalikay kami kanunay sa sala ug mahilayo sa tanang kasamok, samtang nagapaabot kami nga malaumon sa pagbalik ni JesuKristo, among manunubos.

K: *Kay imo man ang ginharian/ ug ang gahom ug ang himaya/ hangtod sa kahangturan.*

P: Ginoong JesuKristo, nag-ingon ka sa imong mga Apostoles, “Ang kalinaw ibilin ko kaninyo, ang akong kalinaw ihatag ko kaninyo.” Ayaw tan-awa ang among mga sala, kondili ang pagsalig sa imong Simbahan ug sibo sa imong kabubut-on hatagi kami sa imong kalinaw ug kahiusa, Ikaw nga buhi ug hari hangtod sa kahangturan.

K: *Amen.*

P: Ang kalinaw sa Ginoo sa kanunay maanaa kaninyo.

K: *Maanaa usab kanimo.*

P: Ipakita ta ang atong panag-inigsoonay.

### **Kordero sa Dios**

K: *Kordero sa Dios nga nagawatang sa mga sala sa kalibutan, kaloy-i kami. Kordero sa Dios nga nagawagtang sa mga sala sa kalibutan, kaloy-i kami. Kordero sa Dios nga nagawagtang sa mga sala sa kalibutan, hatagi kami sa kalinaw.*

### **Pangalawat**

P: Kini mao ang Kordero sa Dios nga nagawagtang sa mga sala sa kalibutan. Bulahan ang gidapit alang sa panihapon sa Ginoo.

K: *Ginoo, dili ako angay nga mokalawat kanimo, apan ipamulong lamang ug mamaayo ako.*

### **Pag-ampo Human sa Pangalawat**

P: Mag-ampo kita: Itugot, nangaliyopo kami, langitnong Amahan, nga ang among pagkalawat niining Sakramento sa Pasko aduna untay malahutayong epekto sa among mga utok ug mga kasingkasing. Pinaagi ni Kristo among Ginoo.

K: *Amen.*

### **Katapusang Panalangin:**

P: Ang Ginoo maanaa kaninyo.

K: *Maanaa usab kanimo.*

P: Moduko kita ug atong dawaton ang bendisyon sa Ginoo: Ang Diyos, kinsa pinaagi sa Pagkabanhaw sa



iyang Bugtong Anak nahimuot sa paghatag kaninyo sa gasa sa kaluwasan ug pagkasinagop, magahatag unta kaninyo ug kalipay pinaagi sa iyang mga panalangin.

*K: Amen.*

P: Hinaut nga siya, kansang buhat nga makaluwas nakahatag kaninyo'g gasa sa kagawasang walay katapusan, maghimo unta kaninyo nga mga manununod sa kabiling walay katapusan.

*K: Amen.*

P: Ug hinaut nga kamo, nga nabanhaw na uban ni Kristo diha sa Bunyag pinaagi sa pagtoo, sa inyong pagpuyo nga husto dinhi sa kalibutan, mahiusa unta uban kaniya didto sa puluy-anang langitnon.

*K: Amen.*

P: Ug ang mga panalangin sa labawng makagagahum nga Dios, ang + Amahan ug Anak ug ang Espiritu Santo, mokunsad unta diha kaninyo ug magpabilin diha kaninyo kanunay.

*K: Amen.*

P: Panglakaw kamo ug himayaa ang Diyos sa inyong kinabuhi, Aleluya, aleluya.

*K: Salamat sa Diyos, aleluya, aleluya. ■*

Please help us continue publishing this Missalette with your donation.

Any amount is appreciated no matter how small.

Thank you!

Account Name:

Communication Foundation for Asia

Metrobank V-Mapa, Sta. Mesa,

Manila Branch:

SA# 3306-509-480

BDO Old Sta. Mesa Road, Manila Branch:

SA# 7090-042-836

Please fax deposit slip to 713-2736

We are located at # 4427 Old Sta. Mesa St.,  
Sta. Mesa, Manila

**Ang Simbahan sa  
Kabus,  
pinaagi sa  
Gagmayng  
Simbahanong  
Katilingban,  
makaapil sa  
Pagkabanhaw ni  
Kristo sa  
panahon nga,  
sa iyang  
pagsangyaw ni  
Kristo sa tibook  
kalibutan, siya  
usab molihuk alang  
sa kalingkawasan  
ug kausaban sa  
kalibutan  
sumala sa mga bili  
sa Ginghamarian sa  
Langit.**

U bani si Fr. Ben Alforque, MSC sa Missionaries of the Sacred Heart sa iyang **GOSPEL BREAK**, hamubo apan makalingaw nga video mahitungad sa Ebanghelyo karong Dominggo. Bisitaha ang **gospelbreak.wordpress.com**. o pinagi sa inyong smartphone o tablet i-swipe kini nga QR code.

